

percussa, fœtido cruore, quasi *santalo* uncta, YAMÆ habitationem ingressa est.

21. Tum TÁDAKÆ occisor accepit a vate, qui hoc facto lætabatur, telum dæmones occidens, incantamento præditum, veluti gemma, soli grata, accipit a sole splendorem, lignum incendens.

22. Deinde, ingressus in purum Nani eremum, a vate sibi indicatum, RAGHUIDES, etsi oblitus rerum in priore vita gestarum, desiderio commovebatur.

23. Deinde vates intravit in sylvam, ipsius castigationibus sacratam, in qua discipuli honores paraverant, cujus arbores ramorum folia manuum instar jungebant, et cujus feræ vultibus erectis eum intuebantur.

24. Ibi uterque DASARATHÆ filius vatem, sacris initiatum, sagittis suis contra impedimenta protegebant, ut luna et sol, vicissim orientes, radiis suis mundum defendunt a tenebris.

25. Tum vero sacrifici, aram fœdatam videntes sanguinis guttis, *bandhujivorum* florum instar magnis, horrore perculsi opus relinquebant, atque cochlearia sacrificalia, e *vikankati* ligno facta, abiciebant.

26. Statim RÁMAS suspiciens, sagittam e pharetræ ore expromens, conspexit in aere *Rákshasorum* exercitum, cujus vexilla vulturum alarum ictibus movebantur.

27. Ibi utrumque *Rákshasorum* ducem sagittarum scopos fecit, aliis neglectis: etenim GARUDAS, contra magnos angues pugnare valens, num idem parvos serpentes adoritur?

28. Ille, telorum gnarus, telum celerrimum, venti deo sacrum, arcui imposuit; atque hoc TÁDAKÆ filium, vel saxi instar gravem, haud secus ac folium flaccidum dejecit.

29. Alter *Rákshasus*, SUBÁHUS appellatus, magica vi huc illuc confugiebat; quem dexter ille sagittis, quæ soleis ferreis armatæ erant, discindens, extra eremum avibus distribuit.

30. Utriusque juvenis, qui ita sacrificiorum impedimenta dispulerant, robur bellicum celebrantes, sacerdotes taciturni stirpis domini sacra justo ordine perfecerunt.